

## Istuorējē apie Keistuti ēr Bērota

Eso Bērotelē –  
Straini kāp kvietkelē.  
Da strainiesni vaiki  
Mon lēkēms pataikē:

Pēzēka Keistutis  
Pri sosieda kūtēs,  
Pareinont iš šuokiu,  
Meilēs moni muokē...

No, ka pamīliejē,  
Žanītēis reikiejē.  
Bovuov šiuo tuo vertē –  
Skoudē gavuov kertē.

Mona Keistutielis –  
Svēks kāp batvēnielis:  
Nikumet nesērga –  
Vākus monēi dērba.

Nuors ta meilēs siejē  
Mon ēr apkīriejē,  
Kiestis smaugē kinkas –  
Net luovelē linka!

Lieliu – kap tū pupu –  
Pašalēs pritūpē:  
Beveik kol pasenuov,  
Pašalpuoms gīvenuov.

Tuokio darbo joudo  
Kieliev vedo Skouda.  
Tik par metu krūva  
Srienas mon išdžiūva...

Ka išseka skarbā –  
Kestiou nebier darba.  
Vīra nenervuosi –  
Leidau eit pas Zuosè...

Biega nakti kuožna!  
Tiktā neatvuožnē:  
Par pat Juona švėnta  
Mīžopie nuskėnda...

Daba leido dėinas  
Aš, našlelė, vėina:  
Gluostau luovas kuojė,  
Kiesti mėnavuojō.

Gero, pešo dūma.  
Vākā – pas babūnė.  
Vėina tik pagouda:  
Vākštiojint po Skouda,

Prisimint Keistuti  
Ēr sosieda kūti,  
Kor pasėkavuojiev  
Ēr paprabavuojiev...